

- नारी शक्ति वंदन कानून रा बारा मांय चर्चा सारू संसद रो तीन दिन रो खास सत्र काल सारू व्हेला।
- मुख्यमंत्री भजनलाल शर्मा कह्यो— नारी शक्ति वंदन कानून रे जरिए नीतियां बणावण रा काम मांय महिलावां री सीधी भागीदारी तैय व्हेला।
- सीबीएसई मैट्रिक रा इम्तिहान रो नतीजो जारी कीनो— 93 दशमलव सात शून्य फीसदी विद्यार्थी पास व्हेला।
- राज्य सरकार खरीफ-2025 सारू दिया ज्या कम मियाद रा बिना ब्याज रा कर्ज रा चुकारा री आखिरी तारीख 15 मई ताई बधायी।
- प्रदेश मांय गर्मी रो असर और बध्यो— कोटा, चित्तौड़गढ़, जैसलमेर अर चूरू समेत केई ठौड़ां दिन री बगत पारो 40 डिग्री सेल्सियस ने पार कीनो।

000

संसद रो तीन दिन रो खास सत्र काल सारू व्हेला। केन्द्र सरकार ई सत्र मांय महिला आरक्षण कानून लागू करण सारू जरूरी संवैधानिक बदलावां रा प्रस्ताव पास करावण री कोशिश करेला। लोकसभा मांय काल अर 17 अप्रैल ने महिला आरक्षण बिल माथे चर्चा करी जावेला। नारी शक्ति वंदन कानून 2023 रा तैत लोकसभा अर राज्यां री विधानसभावां मांय महिलावां सारू 33 फीसदी सीटां आरक्षित करण रो प्रावधान है। ई कानून रा बारा मांय जाग जगावण सारू आज जयपुर रा बिड़ला सभागार मांय नारी शक्ति वंदन सम्मेलन राखी ज्यो। कार्यक्रम मांय मुख्यमंत्री भजनलाल शर्मा कह्यो के नारी शक्ति वंदन कानून रे जरिए संसद अर विधानसभावां मांय महिलावां ने 33 फीसदी आरक्षण सागे नीतियां बणावण रा हलका मांय वां री सीधी भागीदारी तैय व्हेला। श्री शर्मा कह्यो के विकसित भारत रो सपनो सांचो करण मांय महिलावां रो खास काम है।

-----

जळसा मांय उपमुख्यमंत्री दीया कुमारी कह्यो के ई कानून ऊं देश मांय मोटा सामाजिक बदलाव आवेला। जळसा मांय ई कानून री हिमायत सारू एक मिस्ट्रड कॉल नंबर जारी करी ज्यो अर हस्ताक्षर अभियान री सुरुआत करी ज्यी। मुख्यमंत्री आज ही वीडियो कॉन्फ्रेंस रे जरिए टाबरियां सागे बातचीत कीनी। वे मेडिकल, इंजीनियरिंग, पेट्रो कैमिकल अर डेटा साइंस हलकां री टाबरियां सागे नारी शक्ति वंदन कानून रा बारा मांय चर्चा कीनी। मुख्यमंत्री पचपदरा मांय तेल साफ करण रा कारखाना मांय काम करण वाळी महिला इंजीनियरां ऊं वां रा अनुभव री जाणकारी लीनी। रिफाईनरी मांय काम करण वाळी इंजीनियर आंचल विश्वकर्मा नारी शक्ति वंदन कानून ने सरकार री मजबूत पहल बतायी।

000

भारतीय जनता पार्टी रा प्रदेश अध्यक्ष मदन राठौड़ कह्यो है के बालोतरा रिफाइनरी परियोजना राज्य रा औद्योगिक अर माली विकास सारू मील रो भाटो साबित व्हेला। वे आज पाली मांय खबरनवीसां सागे बातचीत कर रह्या हा। राठौड़ कह्यो के तेल साफ करण रा ई कारखाना ऊं प्रदेश ने हर साल आठ हजार करोड़ रुपया री और आमदनी व्हेला अर नौकरी-धंधा रा नुवा मौका मिलेला।

नारी शक्ति वंदन कानून रो जिक करता थकां वे कह्या के ई सारू संसद रो काल ऊं तीन दिन ताई चालण वाळो खास सत्र व्हेला जिण मांय महिलावां सारू विधायी संस्थावां मांय एक-तिहाई सीटां आरक्षित करी जावेला। श्री राठौड़ आवता बगत मांय सीटां रा आबादी रा आधार ऊं कर्या जावण वाळा परिसीमन पाछे राज्य मांय लोकसभा अर विधानसभा री सीटां री तादाद बध जावण रा आसार ई जताया।

000

केंद्रीय माध्यमिक शिक्षा बोर्ड-सी.बी.एस.ई 10वीं रा इम्तिहान रा नतीजा रो ऐलाण कर दीनो है। इम्तिहान मांय 93 दशमलव सात शून्य फीसदी विद्यार्थी पास व्हे ग्या। आ तादाद लारला साल रे मुकाबले शून्य दशमलव शून्य चार फीसदी बत्ती है। ई साल ई लड़कियां रो नतीजो लडकां ऊं बेहतर रह्यो। नतीजो आधिकारिक वेबसाइट माथे देख्यो जा सके है। आधिकारिक पोर्टल सागे ई डिजिलॉकर अर उमंग ऐप सरीखा प्लेफॉर्म रे जरिए ई नतीजो देख्यो जा सके है।

000

प्रधानमंत्री नरेंद्र मोदी जनता ऊं विकसित भारत रो सपनो सांचो करण सारू विकास रा नौ हलकां मांय पूरा मन ऊं काम करण बाबत् कह्यो है। वे आज कर्नाटक मांय मांड्या कने आदिचुंचनगिरी मठ मांय गुरु भैरवैक्य मंदिर रा उद्घाटन रे मौके बोल रह्या हा। प्रधानमंत्री पाणी बचावण अर प्रबंधन, 'एक पेड़ मां के नाम' कार्यक्रम रा तैत पौधा रोपण अर आरे-सारे री धार्मिक ठौड़ां, गांवां अर शहरां ने साफ राखण माथे जोर दीनो। श्री मोदी रसायनां अर कीड़ा मारण री दवाइयां ने कम काम लेवण अर जैविक अर कुदरती खेती री जरूरत बतायी।

000

राज्य सरकार खरीफ-2025 सारू दिया ज्या कम मियाद रा बिना ब्याज वाळा कर्ज रा चुकारा री आखिरी तारीख बधा र 15 मई कर दीनी है। सहकारिता राज्य मंत्री गौतम कुमार दक आ जाणकारी दीनी। वे बतायो के ई फैसला ऊं प्रदेश रा पांच लाख 57 हजार ऊं बत्ता किसानां ने फायदो मिलेला। दक कह्यो के आखिरी तिथि बधावण ऊं किसानां रा करीब दो हजार 184 करोड़ रुप्या रा कर्ज री मियाद निकळ जावण ऊं बच जावेला। श्री दक पात्र किसानां ऊं नुवी मियाद ताई कर्ज चुकता करण री अरज कीनी है।

000

राजस्थान पुलिस रा 77 वां स्थापना दिवस रा सिलसिला मांय राज्य मांय न्यारा-न्यारा कार्यक्रम राख्यी ज्या। आज जयपुर रा पुलिस आयुक्तालय मांय राख्यी ज्या कार्यक्रम मांय बेहतरिन काम करण वाळा 6 पुलिस वाळां ने 'कांस्टेबल ऑफ द मंथ' ईनाम ऊ नवाजी ज्या। ई मौके जयपुर रा पुलिस कमिश्नर सचिन मित्तल कह्यो के ई मान रो मकसद पुलिस वाळां रो मनोबल बधावण सागे वां ने बेहतर काम री सीख देवणो है। पुलिस कमिश्नर कह्यो के जयपुर पुलिस आमजन में विश्वास और अपराधियों में भय रा ध्येय वाक्य सागे काम कर रही है। राजस्थान पुलिस स्थापना दिवस रे मौके काल जयपुर मांय राज्य स्तर रो जळसो राख्यो जावेला। इण मांय मुख्यमंत्री भजनलाल शर्मा रो खास पावणा रा तौर ऊं शामिल व्हे र परेड री सलामी लेवण रो कार्यक्रम है। पुलिस महानिदेशक राजीव शर्मा बतायो के जळसा री सरूआत शहीद स्मारक माथे सिरधा रा फूल चढावण सागे व्हेला। ई मौके व्हेवण वाळी परेड मांय 12 प्लाटून शामिल व्हेला अर बेहतर काम करण वाळा पुलिस वाळां अर जनता रो मान कर्यो जावेला। ई मौके रिटायर व्हा पुलिस वाळां रा सुबीता सारू नुवा पोर्टल अर मोबाइल ऐप री सरूआत ई करी जावेला।

000

फौज री सप्त शक्ति कमान रो 22वां स्थापना दिवस आज जयपुर मांय मणायी ज्यो। 15 अप्रैल 2005 ने बणायी ज्यी आ कमान भारत री फौज री सातवीं कमान है। ई मौके जयपुर मिलिट्री टेशन मांय राख्यी ज्या जळसा मांय फौज रा कमांडर लेफ्टिनेंट जनरल मनजिंदर सिंह कमान रा आदर्श वाक्य 'सर्वदा विजयी भव' रा हिसाब ऊं जवानां रा देश री आतूणी सरहद री हिफाजत करण अर फौजी बेहतरी रा प्रति समर्पण री सराहवणा कीनी।

000

प्रदेश मांय घणखर ठौड़ां पारो चढ़बा सागे गर्मी रो असर बधबा लाग्यो है। कोटा, चित्तौड़गढ़, जैसलमेर अर चूरू समेत केई ठौड़ां दिन री बगत तापमान 40 डिग्री सेल्सियस ने पार कर ग्यो। लारला चौबीस घंटां रे दौरान 41 दशमलव 6 डिग्री सेल्सियस ऊंचा-ऊं-ऊंचा तापमान सागे बाड़मेर सब ऊं उन्नी ठौड़ रह्यो, जद के सब ऊं कम तापमान सीकर मांय उन्नीस डिग्री सेल्सियस दर्ज करी ज्यो। मौसम केंद्र जयपुर रे मुजब आवता चार-पांच दिन ताई प्रदेश मांय पारो दो ऊं तीन डिग्री सेल्सियस और चढ़बा रा आसार है। मौसम महकमो 17 अर 18 अप्रैल ने जोधपुर अर बीकानेर संभाग रा कुछ हिस्सां मांय लू बाजण री शंका जतायी है।

000

आई.आई.टी. जोधपुर रा वैज्ञानिक सूरज री रोशनी ऊं बिजली बणावण अर जमा करण री तकनीक मांय मोटी कामयाबी हासिल कीनी है। संस्थान मांय भौतिकी विभाग रा डॉ. शाहब अहमद अर वां री टीम सूरज री रोशनी ऊं खुद चार्ज व्हेर बिजली संभाळ र राखण वाळी 'फोटो-बैटरी' बणायी है। फिलहाल सूरज री रोशनी ऊं बणायी ज्यी बिजली रा इस्तेमाल सारू सोलर पैनल अर न्यारी बैटरी री जरूरत पड़े है, पण ई खोज पाछे एक ही मशीन दोन्यू काम कर सकेला। इण ऊं आवता बगत मांय मोबाइल फोन, ड्रोन अर बिजली ऊं चालण वाळी गाड़ियां हल्की व्हे जावण सागे वां ने बार-बार चार्ज करण री जरूरत नी पड़ेला।

000

मुख्य सचिव वी. श्रीनिवास मुख्यमंत्री विकसित ग्राम-शहरी वार्ड अभियान रा काम तैय बगत मांय पूरा करण रा हुकम दीना है। वे आज जयपुर ऊं वीडियो कॉन्फ्रेंसिंग रे जरिए ज़िला कलेक्टरां सागे मीटिंग कर र अभियान रा कामकाज रो जायजो ले रह्या हा। मुख्य सचिव 15 मई तांई ग्राम पंचायतां अर शहरी वार्ड रा मास्टर प्लान पोर्टल माथे अपलोड करण रा हुकम दीना। मीटिंग मांय जाणकारी दीरीजी के ई अभियान रा तैत भणार्ई-लिखार्ई, स्वास्थ्य अर पाणी रा प्रबंधन समेत 11 खास हलकां मांय डिजिटल बेसलाइन तैयार करी जा रही है।

000

जयपुर रा कलेक्ट्रेट सभागार मांय काल जनसुणवाई अर समाधान कार्यक्रम राख्यो जावेला। संवारे 11 बज्यां ऊं दोपहरां पाछे 2 बज्यां तांई व्हेवण वाळी जनसुणवाई मांय जनता री परेशानियां रो बेगो निपटारो कर्यो जावेला।

000

प्रधानमंत्री नरेन्द्र मोदी 26 अप्रैल दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 133वीं कडी व्हेला। ई सारू आप ई 24 अप्रैल तांई मुफ्त नम्बर 1800-11-7800 माथे राय भेज सको हो। ई सागे ई नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000